

اللي انكسريتطوح
أحمد شلبي

اللى انكسر يتطوَّح / شعر

أحمد شلبي

الطبعة الأولى ، ٢٠٠٨



دار اكتب للنشر والتوزيع

القاهرة ، اش المعهد الديني ، المرج

هاتف : ٠٢٢٤٤٠٥٠٤٧

موبايل : ٠١٢٩٢٥١٥٩٢ - ٠١٨٢٣٦٣٠٣٥

E - mail : dar_oktob@gawab.com

المدير العام :

يحيى هاشم

فوتوغرافيا :

وليد منتصر

تصميم الغلاف :

حاتم عرفة

تدقيق لغوي :

أحمد منتصر

رقم الإيداع : ٢٠٠٨/٢١٠٤٧

I.S.B.N : 978-977-6297-52-4

جميع الحقوق محفوظة ©

اللي انكسر يتطوّح

شعر

أحمد شلبي

الطبعة الأولى

٢٠٠٨



دار الكتب للنشر والتوزيع

إهداء

إلى

من أهدوني حروف الحلم

أهلي

بور سعيد

وواحدة لسه مشوفتهاش

مدخل

شارح قلبك الضيق

ساح مية

وما كفاي

لكني وقفت يا قمرى

حشاه خاطرك

صف تاني

سبع طوبات

سبع بلاطات
واحنا من بعيد واقفين
سبع بلاطات
واحذف حزني ينسفهم
أقوم طائر مع الطائرين
سنين العمر تتبخر
لقا وفراق
جيوي
تتعلي أشواق
سبع بلاطات
وانا بجري سنين وسنين
وانا بجري بين الفريقين
سبقت أصحابي
فين همّا
وروح انا فين
سبع بلاطات

مرقت دخلت في العشرين
سبع بلاطات
ولسّه اللعبة شغالة
وانا بجرى على الثلاثين

البداية

وتتبعثر
حكاوي العمر من إيدى
حروف تجرى على سطور الزمن ترص
يتوه بكره في ليل الأمس
كما نجمة في ليل دبلان
أتوه بردان
تدفيني يدوب ذكرى
في قلب جعان
لحدوتة لكam فكرة
ترم الحلم
وتصلب حيل قصيدة عشق منسية بين الكشاكيل
وأفتكر
يفور النيل
يرد الشعر لعروقي
من طرف القلم تنزل
بيوت شبائك
أفوت منها ليراح الكون

أكون ساحر
أكون مجنون
في بحر الفرح أكون قارب
ولد راكب
حصان الشعر على بكرة
أكون فكرة
ساعات مطرة
أكون جناحات
بتحضن سر بين حبيبين
أكون جوابات
و أتفرق على العناوين
أكون عكاز لأحلامك
أكون برواز لأيامك
وفيه مرسوم
وأهرب جرى م الألبوم
على إيديكي
وأحضنهم... ندوب إحساس
أكون الناس.. وأحلامهم
أكون دهشة
أكون معنى

صورة جديدة تجمعنا

صورة قديمة

بتعافر مع النسيان

أكون فنان

أكون انسان

قصيدة في حضن مريكا

أكون ضحكة تحنى عيون

أكون للحزن أستيكة

أول شتا

أول شتا
والقلب عطشان من زمن
نزل المطر
عجن التراب ريحة شجن
الصيف هرب
سحابة بيضا مروحة وسط الغيوم
رجع الشتا بالذكريات
غسل الهموم
لملم حكاوى مفتفتة
لناس وحشها الكلفتة
في بلاطى صوف
لمشي ع الكورنيش تحت المطر
صحى الحروف
خلانى اكتب من جديد
وأغنى للطير اللي راجع من بعيد
م الفنار

كان للشتا وإحنا صغار
أغاني فينا بتتنقش
ودعوة يدعوها الكبار
ندعى قلوبنا ترتعش
نفرح نروح فوق السطوح
نملي كفوفنا بالمطر... نقول يا رب
الكلمة تطلع من قلوبنا للسما
طفل انما
من صغرى مندوه للشتا
كان البداية والنهاية واللى كان
من زمان مر ومضى
كان روح وعشق وفضفضة
والشجر.. قالع هدومه
رجع الشتا ويّا المطر
يعلن قدومه
بالنوارس وبالنوة
بريحة الأرض بعد ما تخلص الشتوة
بجد عجوز على الدكة بيتشمس
وصوت فيروز مع القهوة
ندى يلمس

حاجات ماتت.. يفوقها
تعود كراريسى وورقها مع الجلاّد
وصوت الأبلّة فى الحصّة.. يقول يا ولاد
الخريف بعديه شتا
ووراها أقول...أكبر أطول
أنسى الحاجات...أنسى الفصول
لكنى لسه فى السهر
بكتب قصايدى ع الشجر
وعملى مع أول شتا
قلبي بيفرح بالمطر

حاجات كثير

حاجات كثير فيكي
حاجات كثير فيا
يا هل ترى إنت
ممکن تكون هي ؟
نصي اللي بتمناه
من عمر بستناه
وألقي كمان شايلاه
نفس الشعور ليا
بينى وبينك روح
علامات بترسم حلم
من غير كلام بنوح
فنطقنا نفس الاسم
حتى اللي بتخبيه
هو اللي أنا بداريه
حسّاه وحاسس بيه
بيقول أكيد هي
شكلك كده ليا

راجل فريد

ولسّه فلوكتك ع الرمله
بتنادى العدة المتخبية فى بطن سريرك من سنتين
وكأنك هتقوم الفجر
وترمى شباكك جوه البحر النائم لسه فى حضن الليل
لسه بتحلم تركب موجه العالي
زى ما كنت زمان بتريسيها
وبعد العصر ترقع غزلك
المنصوب على حيطه قديمه
رسمت عليها زمان وأنا عيل وردة ومركب
لسه بتحلم ترجع يوم
وأنا يوم ورا يوم بفتكرك كل ما أروح البحر لوحدي
والمح مجدي فى نفس مكانه آخر الحارة
وضحكك لما تناديه
وشحطتك فى البيت سارة
تنكسف .. تقوم عاطيها أوام جنيه
لسه فلوكتك بره البحر بتحلم بيه

لسه بتحلم يوم تلقاك
ولا تعرفش إن إنت هناك
وخلص مش جاي
والبحر خلاص بقه موج نساي
ولا عدش الغزل في قلبه يفيض
رئيس بالفطرة في علم الصيد
بفلوكة ومدرة وخليوة
لميت البحر في غنيوة.. وفي قلى النونو رميتها زمان
لفيت وكبرت بقيت إنسان
والغنيوة في بالي مفارقتنيش
لساني بحب البحر وطيشه
ومن دراويشه
وكل ما أروحله أقرالك الفاتحة
ولسه فلوكتك ع الرمل
بتستنى الطرحة

ولأني واحد ع الفراق
قلبي خلاص معدش فيه إلاّ السفر
حتى إن قدر
يرجع ويسكن في الصفوف
مبقاش يشوف
غير صورة باهتة مترّبة
على كل رف مسرّبة طعم الرحيل
ليه كل ليل مكتوب عليا انقسم
قد الخطاوي
واترسم طول الطريق مشوار شجن
بزيادة توهة في الزمن
إيه التمن علشان أخاصم دنيي
بكره تميل الشمس ترسم سكّي
وبضحكتي
هلضم خيوط الحلم في ديول الفراش
وان يوم ما جاش

معرفة طريقه بالحنين
صلاح جاهين
قال من سنين ساعات أقوم الصبح قلبى حزين
وانا من سنين يوماتى أقوم ملىان ألم
فأمسك قلم
وأرسم بيوت
أرسم بنات
أرسم قلوب..أرسم مراكب
وأمشى بيها للرجوع
أرسم خيوط شمس اللقا
أحلام كثير متشوقة على كل شط
وصوت خطايا على الأسفلت ملاي فراق
مرصوف طريقى دائماً باشتياق
ومفيش حبيبة فى الوداع بتقوللى عود
حتى خلود
راحت كمان
حتى الكمان معدش صوته يهزني
وينحني

أكتب على رمل الطريق
كسبتي
لكنى عمري ما هنجي
وهنتصر
وبنكسر
وأقول زمان جدي خسر وقال مفيش
وأقول مفيش ومشتكيش
وأحلم أعيش
لحد الدنيا ما تقفل آخر صفحة في دفتر سفري
وأسكن فيها ومتسعينش

ورقة شجر

ورقة شجر ع الأرض
وفي ضهرها اسمين
وقلب جواه سهم
بيحضنوه حرفين
ورقة شجر والريح
أخذاها في الطرقات
في يوم رماها جريح
مع ماضي عدى وفات
والقصة أصحابها
معرفش مين ولا فين
ورقة شجر ع الأرض
سابت في قلبي حنين

أيام

أيام بتجرى
فوق قضيب قطر السنين وتفتت عفار
وسط العفار
أشوف طفولتي بترسم
عيل ما بين كبشة عيال
وبنات بترسم ع الطريق أولى وفيونكة ومركبة
مترتبة جوايا لسه الذكريات
عناقيد حنين
وكأني ترنيمه وداع
من بين أغاني الصيادين
موجة تجري م المراكب ع الشطوط
خايف الأيام تفتت
تطوى ملامحي وآثارها
وانا عمري كما أوراق
بتهرب منها أشجارها

دفتر بالغرام ابتدی
کنت زی عیال شارعنا
قلبی أصفی من الندی
کنت برسم ع المدى عصافیر کنار
وافضل أستنی النهار
على طرف شباکنا العتیق
وابدُر الأشعار طریق
واضحک

ضی عینی بیان
کنت زی عیال شارعنا
عفریت زمان
أعرف موسم السمان
وامتی شبارنا یقی کبیر
واغسل وشي م الأحزان
بضحک اصحابی فی الطوابیر
منین بیودی علی کسری
وفین بیودی ع الأفرنج
والاعب العجوز شطرنج

لجلن أكسب الحكايات
أسمر وفايت ع البيوت
المللم م اللي فات روايات
حكاوي البحر والخواجات
ضمّة في حارة بتقسّم
حاجات في القلب بتعلم
وانا راحل وبتعلم
في أرض الشعر والمواويل
وبحر العشق له تفاعيل
بلم شباكهها بحروفي
سطور على شطّي تتلاقى
ولسه في قلبي حزن يساع
ولسه عيوني مشتاقة

ناس

في ناس تشوفها مرة
وتعيش جواك سنين
وناس في كل مرة
تشوفها تقول دي مين ؟
وناس تاخذ حاجات
وناس تسيب حاجات
وناس ويا الساعات
تروح وتسيب حنين

زوربا البورسعيدي

موجود ومش موجود

وسمعه سبقاه

بنطير نعدي حدود

نلاقي ناس عارفاه

سلطان ولو معهوش

والضحكة متفارقوش

وصعب متحيوش

لو عشت لحظة معاه

.....

في كل شارع ولد

متسمى على اسمه

وفي كل حنة وبلد

ينادونا وباسمه

لا عمرنا شغناه

لكننا عشقناه

إنسان كثير نلقاه

متهش يوم عنه

.....

قالوا بتاع حكايات

قالوا كلام ظلمه

عدى وخط وفات

ولا عمر شيء همه

طول عمره ابن البلد

ولا عمره خاف من ولد

والعشق فينا اتولد

ليورسعيد منه

و يمكن بكرة نتقابل

في عز اليرد
بكلفت روعي بملاحك
وأكلم بكرة يفتحلك لبعده طريق
ولما تضيق
بلملم حزني في قصيدة بلون الفرح
وأحب الصبح
لما الليل يبوجعني
وأحب الليل
لما يحن ويساعني
وأحب البحر
شط وموج يغني لي
واحبك طيف
ورا الشباك تبصلي
وأحب القعدة ع الناصية وع الكورنيش
وأحب المصري والدراويش

وبعد العصر جنب الشيش
أحط الشاي وأنفرج
مين من تحت بيهرج وإيه بيتقال
وبكتب شعر لو ينقال
تحمر الحدود فيكي
قلي حدفته جواكي
وروحى رميتها في إيديكي
أنا ليكي بأيامي وأحلامي
وسكة راسمها قدامي هنمشيها
أنا أهلك
بتركيبي حكاية عويصة
حليها على مهلك
لن أمل الانتظار
يمكن بكرة نتقابل
يعود الفجر بخيوط النهار
وندي روحنا باللقا

صباحين وحنة

صباحين وحنة
واسرج نور
لأجمل صحبة بتلاي ولا البتور
ومهما أدور
ما يملى عيوني غير بلدي
وناس بلدي
قلوب ليها بجن واميل
ولو إجه عليا الليل
عمره في يوم هيجعزني
ولا في برده هبات سقعان
ما دام سرحان في نور عينها
كأني في جوية وأسيرها
وعنها ما اغيب
ولد حبيب
بقول فيها كلام يهبل
وبطبل مع البكاش

مفیش حارة مبعرفهاش
مفیش ضمة مبحضرهاش
وعندي اللمبي ع البسطة
ورق وقماش
يعود رمضان اجيب بطّة
ومدبحهاش
وينزل أعس بالفتّاش
لجل ما انتش الحواديت
ولو حببت ميلزمنيش
ولا البوهية ولا الورنيش
ولا الموضة ونصايبها
بكره تيجي لنصيبها لحد البيت
ولد عفريت
وحلمى بسيط
لكني غويط كما بحري
كما النوة في عز الليل
تشوف فيا اللي فات مواويل
وهفضل أميل واغنيها في كل زمان
صباحين وحتة يا عشاقها
في كل مكان

لملميني

لملميني في ضلّ توبك
ازرعيني جوّه قلبك
لونيني لون دروبك
لون شوارع نفسي امشي فيها جنبك
نفسى ادوق سكر كلامك
فوق شفايفك
قلبي شافيك
سهم جوّه ضلوعي راشق
قلبي عاشق
كل كلمة من عنيكى
فين اديكى تحضنني بين كفوفك
إمتى اشوفك؟
يوم قصادي والقي عينك جوّه عيني
امسكيني
هدديني من كتافي
ليه تخافي
دا انتى خالي وانتي عمي

اغرزني ضوافرك في لحمي
خلّني همي ويا دمي من عروقي يطير ويهرب
بكره أقرب من قصيدة في حضن جيبي
ليه تغبي

ونفسي بيكي أعدّي بكره
نفسي بكره يعدّي ليا من عنيني
عمري فيكي عشته بيكي
واللي حاي مكتوب عليك تحضيني برضه تاني
واللي فات ده مش أغاني
مش مرافقة شعر مني
الكلام ده غصب عني
سطر هربان من حكاية
عمرنا شاهد عليها
صدقيني الحكاية منتهت
ولسه فيها
لملميني

رسالة

من فضلك
ولو مفههاش إزعاج
تقوليلي هقابلك إمتى
وهعرفك إزاي
أصلك عوقتي سنين
وانا واقف أبخلق في الجاين
عارف إنه نصيب وأوان
وإن في قلبك ليا مكان
وإن سؤالي حلاوة روح
أو حتى جنان
العمر
بیرمح زی الخیل
واللیل
بیشد معاه میت لیل

مناديل
ونقشت عليها حنين
وحفرت على الأشجار
عناوين
وكتبت أغاني
فرح وأنين
وفي جيبي يدوب
فاضل سواين
هبعثهم ليكي في حضن.. إززة
في بحر الشعر.. هسيها
يمكن
موجة شوق.. تحذفها
لشط عنيكي
والاقيكي

ابن بحر

رغم إلى
مش غريب عنك قوي
مش بعيد عنك قوي
غصب عني
كثير قوي معاك أحس إلى غريب
بنفرط
منك وفيكي
وانسلت
من بين ايديكي
وانفلت
من بين عنيكي
دمعة يخفيها الزحام
الشوارع هي هي
ليل
وكوبري

وإعلانات
يا عجوزة يا صبية
عاكسة صورتي الفاترينات
بين ايديكي
ومش لافيكلي
بين صرخك والسكات
ابن بحر
لكني فيكي
غرقتني الدوامات
رغم إني
مش غريب عنك قوي
مش بعيد عنك قوي
غصب عني كثير قوي
معاكي أحس إني غريب

تصدّق بالله

تصدق بالله

وحياة اللي جمعنا بدون مواعيد

أنا قلبي كأنه لسه جديد

رغم الأحلام اللي بتتباع

وقبضت ثمنها دموع

رغم الأيام اللي بتتسربسب برّه جيوبى

كأن الجيب مقطوع

رغم الأوراق اللي بتسقط

من شجرة عمري بعيد

أنا قلبي كأنه وليد

رغم الدنيا

اللي خدتنى

فى دهاليزها

وعجنتنى وخبزتنى

وحققتنى

بهاريزها
رغم القلوب اللي عرفتھا
و اللي عرفتني
والوشوش الخشب
والوشوش الطيبة
جوايا لسه عيل
دموعه قريّة

كل ما افكر

كل ما افكر
ازاى هقدر
أبص فى عينك قبل ما اسافر
قلبي بيخبط جوه ضلوعي
تجري دموعي
مبقاش قادر إنى أتكلم
بس هسَلَم
بس هسَلَم وانا بتألم من تأنيبك
أيوه هسيبك
أيوه العيل اللي كتبلك أحلى كلام وغرام
اللي رسملك بكره خريطة
ولو نسهالك بالأحلام
اللي همسلك مرة بحبه وقالك بحلم بيكي وليكي
ملاقاش فيكي
اللي يلصم روحه بكلمة

لما الضلّمة غطّت كل ملامحه القايّدة
وبقت العتمة بحر بتغرق فيه الشمس
الفاخحة بياها على أحلامه المتعطّية بباقي ملامحك
بحرك قمح

صورة قديمة في برواز روحي
كنت أتمنى في لحظة تبوحي
ولو بعنيكي تقولي استنى
كنت أتمنى تنطقي إسمي
لو مضروب سكينه في حلمي
كنت هجّيلك
لكن فجري في زحمة ليلك
تاه واتأخّر
وانا على ناصية عمري لوحدي
شايل بكره
ولسه بفكّر

بالله عليك

بالله عليك
لو هحبك
متقوليش كان ليا ماضي
أصل كان لي حبيبة قبلك
عاشقة حمسة قبل مني
و كنت راضي
متخافيش... ولا تضحكيش
ولا تقوليش عليا فاضي
مش راح أفسى يوم عليك
ومش راح أعمل قلبي قاضي
بس نفسي
لو هحبك
متقوليش كان ليا ماضي

دُفْعَة

وبتعوي الصحرا في برد الليل
فيدفّي رُوحه بضحكته
واقف لوحده من ساعات
سهران في نوبة خدمته
صورة حبيته بين إيديه
من ليل شارعهم بتناديه
والراديو جنبه سومه فيه
صوقها مونس وحدته
الفجر يتسحب يفوت
من بين شبائك الخنادق
يحسب بإيده ع الحيطان
فاضلة كام فجر ويفارق
صاحبه وسلاحه ومخلته
من تاني يرجع دُنِيته
ولا عمره ينسى دفعته
مهما تفرقهم مفارق

صيد الكنال

آخر حدود اللعب واخنا صغار

رحلة صيد

بهلب جديد .. وسنارة

نسييت بيتنا

بلهفة نخطى عتبنا

و (عدتنا)

بفرحة في قلبه نرميها

نطعمها .. ندليها

وننتشها بدنيس وسيحان

بقاله زمان

قاسم بورسعيد نصين

ملونهم بلون واحد

وليل واحد

وانا قاعد لوحديا

ولسه الغابة في إيديا

يسجي اصحابي (فادي ونور)

ألم الدور

وأقوم طابب وأخذ غطس

بين الموجة والتيار

واتصور كمان تذكّار

في طرف فلوكة متشعبط

جميلة الدنيا لو تثبت على دا الحال

لكنه محال

سلو الليل يشدّه نهار

وينسى في جيبي من ريحته

يدوب.. تذكّار

صورة أخذها من صغري

ما بين الموجة والتيار

عيونك

عيونك زهرتين نرجس
وحلم جديد
فرحة طفل بسمبسن
في ليلة العيد
عيونك شباكين ووريد
يضخ العشق في عروقي
وشوقي
بحر مالو قرار
عيونك شريانين أسرار
وانا اللي هصون
أنا المفتون
أنا السابح في حكاويكي
لآخر الكون
أنا المحنون بأيامك
أنا بكره وأحلامك

أنا اللي معايا مفتاحك
وعمري ما اخون
أنا عاشق قديم معجون
بمية بحر ونوارس
أنا طيب حنون حارس
أنا مارس وأوراقه
وطير راجع بأشواقه في سبتمبر
يبوس البيت
أنا اللي ربطت خلية
وشديت اللي فات منك
غنا وحواديت
وتحت المطرة قلت هويت
وفيكي أسير
أنا اللي تطويني ملامحك
أنفرد فيهم واطير
أنا اللي يزيدوا عشاقك
أقول أكثر
وعمري ما اغير

مش وحدك

لو هتحتسي في لحظة بوحشة
إوعي تقوللي..... في يوم أنا وحدي
لأ....مش وحدك
يا للي في قلبك مالكيش زي
وإوعي تقولى إنه مجاش
لأ.....منساش
هيفضل فاكر
علشان بكرة بتاعك جاي

لأ مش وحدك
والبنوة الساكنة عيونك
لسه بتحلم
والفنان الساكن روحك
لسه بيرسم
لأ مش وحدك
و فرضًا يعني

مرة مشيتي في سكة لوحدهك
ولو لساعات
صوتك فين.....؟
دا الإحساس أندرم الماس
بيجمع ناس
ويعزف لمة
ويعلى السكة الفاضية حاجات
لأ.....مش وحدك

هتعرفني؟؟

إهداء
للبنات اللتي يتحلم
وصوتها بيعرف ناى.....
سلمى صباحي

١

هتعرفني
أنا عرفاك
سنين قبلك وأنا رسماك
في حلمي خيال
روحين تايهين
مالينا حنين
مشوفناش بعض
لكن طيفنا لبعض آمال

مش قوتلك أنا عرفاك ؟

عرفتني ؟

حلمت بيك وأنا شايفك

وقابلتنى

حلمت بيك لقيت عنيك نفس العيون

نفس الملامح

والحلم طارح صوتك حنون

ارسم حصان

واخطفني بيه

بنبض قلبك أتسند

اكتبلي اسم حروفي فيه

اسمك وحلم بيتولد

جوه العروق بيحري شوق

أحضن عنيك لحظة دفا

وفي الوريد

إحساس جديد

يعني ليك معنى الوفا

عرفتني ؟

برّه الدائرة

لو تطلع برّه الدائرة
هتشوفها من بعيد
هتلاقي الدنيا دائرة
وتعيش إحساس جديد
هتلاقي الكون براح
وتهرب م الجراح
ولو حتى حلم راح
في غيره جاي أكيد

صورة

تخرج من معنى
تخش في صورة
تتجهر غنوة في إيدك ولا تكملش
فتموت أفكارك ع الأوراق
وجيوبك تفضي من التعبير معلنة إفلاسك
تعرى ملامحك
فتغطيها بإحساس زائف
خايف ينكشف الملعوب
وتبان من غير مساحيق الشعر
فتسد فراغ جواك بقصيدة
تستفعل فيها مشاعر روك
فتحضّر كل أرواح الشعرا
وحروف أصحابك في الندوات
في حكاية وليدة
تقلبها بقلمك

تبقى قصيدة

تقراها بصوتك تضحك

وتقول لنفسك كلمة قبيحة

وتقيد اللمض الحمرا في روحك

على واحد كنته زمان في عروقك

تتكعبل في وشوش تشبهلك

فتضيق شراينك بيك

ولا يفضل في زحامك غير قلمك

تشعلق فيه لشطوط تفكيرك

وانت بتحلم إمتى تقابلك

فتقابلك على ناصية يرواز

بتصارع لونك في الفراغات

كمحاولة أخيرة لإنقاذ صورتك

مع آخر صوت عصفور

مع آخر صوت عصفور
الليل يغطي شارعنا
بلحاف حزنه
وصوت القطر تشيله الريح الباردة لحد وداني
رعشة خوف تهز كياني
والقاني
بتوه في الشارع
اللي اتحفظت فيه خطواتي
مع آخر صوت عصفور
الشمس ترحل
تنتحر
تشرق آهاتي
وانا ماشي لوحدي غريب
والليل تغارب بيفيض حكايات

قلبي اللي فرّقه
على قلوب البنات
عمرى اللي فهرّسته عناوين قلق
مع آخر صوت عصفور
بسند على سطر الورق
واسأل سؤال
هو اللقا سكة فراق
فرحة تسملي بتتوئد
ولا الغروب نهر اشتياق
يصب فياً ويتولد

عم سليم

كنت صغير
وكان في شارعنا موجود بيت
يخافه منه
ويعدلوا عنه
وبعد المغرب
يفضلوا يحكوا عليه حواديت
كانوا يقولوا فيه عفاريت
جوّه البيت
كان موجود واحد
دائماً قاعد
واسمه سليم
وانا من صغيري كنت لثيم
أجرى واقرب جنب البيت
أحدف طوبة
وأقول يا سلييم

وأطلع أجلي
يطلع يجري
أجلي ويجري
وعمره ما كان يقدر يلحقني
عدت بيّ سنين وسنين
حدثني الدنيا شمال ويمين
ولسه في بالي عم سليم
ولسه حاجات لزمان تندهنني
فارجع أعدي جنب البيت
أحس في قلبي حاجات تتحرك
القي عيوني بفرحة بتضحك
والقي لساني لوحده بينده
بس في سري
يقول يا سليم

وبتأسف

وبتأسف
عشان خطيت بأحلامي لأحلامي
بدون إذنك
صحبت من نومي على حسك
بيجرح فيا ويقطع
وخفت أرجع تقولي جبان
وأنا جوايا ألف حصان
بيتسابقوا عشان ترضي
ومش راضية
لكن فاضية
تقولي عليا بتلكك
وأنا الساكت .. بقيت ساكت
لكن ماتت
حاجات فيا كانت ليكي بتكون في حلم وليد

وكننت خلاص هقولهاالك.. وامد الإيد
لقتك حد تاني بعيد مبعرفهوش
وأنا اللي بيعني مشترهوش
صبرت

بقيت على حلمي
وقلت نعود
رسمت طريق
رسمت وعود
وقلت أحلم ومش هخسر
صحيت من حلمي متأخر
وعشت الدور كأني حبيب
لقتك حد تاني غريب كأنه ما كان
فاكرة زمان ؟
ياما حلمتي أقولك شعر
أديني أهو عشان خاطرك
كبت قصيدة تقرئها
وانا بشطب حروف اسمك
من الأوراق

وبمحيها

وجوه عيوني.. في دمة حنين وفراق

حرام تزل... لكن نزلت

بمحيها

سؤال

هو العمر ييجري بسرعة
واحنا يدوب ماشيين
ولا ييمشي واحنا بنجري
لكن مش حاسين
أيامنا بتسرقنا وتجري
ونعيش ونقول لسه وبدري
يهرب عمرنا في الليل يسري
السنة نلقاها سنين
ماشيين بنسابق أحلامنا
على سكة بكرة الجاي
نبص وانا نشوف روحنا
نسأل بعضينا ازاي
على غفلة الدنيا تسهينا
من شهر لشهر تعدينا
سحبانا مغمية عيننا

ونفوق على حس سؤال
هو العمر ييجري بسرعة
واحنا يدوب ماشيين
ولا ييجري واحنا بنمشي
لكن مش حاسين

اللي انكسر يتطوّح

إهداء
إلى نص الحكاية....
علي الألفي

اللي انكسر يتطوّح
هنلاقي غيره جديد
والحزن يوم هيروح
ويجينا فرح وليد
واللي انكسر نمحيه
مع اللي فات نرديه
في البحر ونجيه
من قلبنا وعيننا
ع الشط أنا واقف
وحدي ومش خايف
في إيدي كبشة حزن
أضحك وأقوم حادف

ياخذها موج البحر
يضحك يقول شايف
في لحظة راح الحزن
اجري يا واد روح
انسى اللي فات وافرح
عندي هتلقى الحل
أقوله أجمل حل
اللي انكسر ينطوح

وهفضل أحضن الدنيا

وهفضل أحضن الدنيا
وأفتح صدري للأيام
أحب الشط والمية
وأقول في البحر أحلى كلام
أدوب أحلام وعمرى ما أمل
بريحة الفل أفتكرك
برنة عود
بضحكة طفل متبسم يدوب مولود
بزققة الطيور الصبح جنب الشيش
بشناقلك ومعرفكيش
لكن بكرة هنتقابل
وعمشى وأعيش
وأتكعب ولا أزعلشى
هتفضل ضحكى في وشى سنين وسنين

في قلبي حنين
لحاجة لسه معرفهاش
لحلم بعيد
لشوق طاير
فيونكة حمرا في ضفاير
لمعنى ولسه متغناش... وهغنيه
وأغنيلك
حاجات من صغري حبيتها
فحببتك
بيوت أهلي..... صديق راجع
وشوش الناس
ريجة المطرة في الشارع
وطعم البحر والمواويل
في عز الليل
أحن أقوم أصلي الفجر
أشوف العمر زي الطيف
يروح الصيف... وييجي الصيف
وأنا في الدنيا زي الضيف..... جيت وهفوت
حاجات بتعيش... حاجات بتموت

ناس تنساني وأنساها
وناس تخطفني جواها.. وبلقاها
بتتغير في كل طريق
ولسه بريء... وقلبي رقيق
تضيق الدنيا مهما تضيق
أموت فيها وأطير وأفوت
لحد ما أموت
عمرى ما هبكي لو ثانية
وهفضل أحضن الدنيا
وأضحك تضحك الأيام
ولما ألقاكي وألقاني
تتفسر بنا الأحلام
وهلقاكي

الفهرس

إهداء.....	٥
مدخل.....	٧
سبع طوبات.....	٩
البداية.....	١١
أول شتا.....	١٥
حاجات كثير.....	١٩
راجل فريد.....	٢١
سفر.....	٢٣
ورقة شجر.....	٢٧
أيام.....	٢٩
ناس.....	٣٣
زوربا البورسعيدى.....	٣٥

٣٧.....	و يمكن بكرة نتقابل
٣٩.....	صباحين وحتة
٤١.....	للميني
٤٣.....	رسالة
٤٥.....	ابن بحر
٤٧.....	تصدق بالله
٤٩.....	كل ما افكر
٥١.....	بالله عليكى
٥٣.....	دفعه
٥٥.....	صيد الكنال
٥٧.....	عيونك
٥٩.....	مش وحدك
٦١.....	هتعرفني
٦٣.....	بره الدايه

٦٥.....	صورة
٦٧.....	مع آخر صوت عصفور
٦٩.....	عم سليم
٧١.....	وبتأسف
٧٥.....	سؤال
٧٧.....	اللي انكسر يتطوح
٧٩.....	وهفضل أحضن الدنيا

عن الشاعر

- أحمد محمود شلبي
- مواليد ١٩٨١/٧/٣ بورسعيد .
- تخرج من كلية تجارة جامعة قناة السويس ببورسعيد
- يعمل محاسب .
- عضو نادي أدب بورسعيد.
- عضو نادي أدب بورفؤاد .
- عضو مؤسس في جماعة مرايات الأدبية ٢٠٠٦.
- عضو في العديد من الكيانات الأدبية .
- حصل على المركز الثاني في شعر العامية مسابقة استاد بورسعيد ٢٠٠٦.
- حصل على جائزة التميز في مسابقة القصة القصيرة عن اقليم القناة وسيناء عن قصته (صابر) ٢٠٠٧.
- شارك في العديد من الندوات والمؤتمرات الأدبية
- شارك في مؤتمر ادباء الأقاليم ببورسعيد ٢٠٠٥
- شارك في مسابقة معهد جوتة للشعر (سلام بوتري) بساقية عبد المنعم الصاوي ٢٠٠٧.
- نشرت أعماله في العديد من الصحف .

له تجربة فى الشعر الغنائى وكتابة الأغنية حيث كتب عدد من الأغنيات لمجموعة من المطربين والمطربات الشباب .
كتب أغنية (خد بس قرار) والخاصة بحملة حماية مكافحة الأدمان .

له تحت الطبع :

(لعب عيال) ... ديوان بالعامية
(م العرب للأفرنج) ... مجموعة قصصية

للتواصل :

Hesterua@hotmail.com